

Zakon o posredovanju u zapošljavanju i socijalnoj sigurnosti nezaposlenih osoba

Udruženje poslodavaca u FBiH već dugi niz godina pokreće inicijative i kontinuirano ukazuje na slabosti važećeg Zakona o posredovanju u zapošljavanju i socijalnog sigurnosti nezaposlenih osoba. Cilj ovih inicijativa je unapređenje funkcionisanja tržišta rada i efikasnije djelovanje institucija nadležnih za zapošljavanje.

Prije dvije godine, u mandatu federalnog ministra rada i socijalne politike, ponovno je otvoren proces izmjena ovog Zakona, čime je obnovljena inicijativa Udruženja poslodavaca u FBiH. U okviru tog procesa pokrenut je rad na pripremi izmjena zakonskog okvira, pri čemu je Udruženje aktivno učestvovalo kroz dostavljanje konkretnih prijedloga i rješenja.

Udruženje je posebno insistiralo na rješavanju nekoliko ključnih pitanja od značaja za funkcionisanje tržišta rada:

- Razdvajanje evidencija aktivnih i pasivnih tražilaca posla na evidencijama nezaposlenih osoba;
- Unapređenje postupka posredovanja u zapošljavanju kroz modernizaciju rada i procedura nadležnih službi i zavoda za zapošljavanje;
- Uključivanje predstavnika Udruženja poslodavaca u punopravan sastav Upravnog odbora Zavoda za zapošljavanje, s ciljem unapređenja priprema i realizacije programa zapošljavanja i aktivnijeg učešća poslodavaca u politikama tržišta rada.

U procesu pripreme zakona, radna grupa i nadležno ministarstvo u velikoj mjeri su prihvatili prijedloge Udruženja poslodavaca, čime je potvrđena važnost aktivnog uključivanja predstavnika poslovne zajednice u kreiranju javnih politika u oblasti rada i zapošljavanja, ali predstavlja važan korak naprijed u odnosu na postojeći zakonodavni okvir.

Udruženja poslodavaca u FBiH smatra da su pitanja razdvajanja evidencija nezaposlenih osoba, unapređenja postupka posredovanja u zapošljavanju i uključivanje predstavnika poslodavaca u upravljačke strukture Zavoda za zapošljavanje minimum **reformskih mjera koje je potrebno usvojiti u ovoj fazi.**

S obzirom na činjenicu da se na donošenje novog zakona čeka više od deset godina, te da postojeći zakonski okvir u značajnoj mjeri doprinosi institucionalnoj i pravnoj nejasnoći u sistemu zapošljavanja, njegovo usvajanje predstavlja važan korak ka uređenijem i efikasnijem tržištu rada u Federaciji BiH.

Zakon o posredovanju u zapošljavanju i socijalnoj sigurnosti nezaposlenih osoba je bio u Parlamentarnoj proceduri **12.03.2026. godine** i nije usvojen.